

Der Leugner

1

Host scho ghert, da Drosten hoit si
An Haufn Kinder im Kaneu
Und da Bill Gates, der schdöds mit Windows ruhig
Sunst mochns an Kraweu

Und de zwa forschen gemeinsaum
An an Anti-Aging-Gen
Damit mia Oamen früher sterben
Und de Reichen ewig leben

Und si erfinden a große,
A furchtboare Pandemie
A wödweide, und olle glaubens
Außer i

Weu sie woin uns nur a Zwaungsimpfung
Zuwidividieren
Mit ders uns daun an Chip
Zur Überwochung implantieren

2

Auf amoi krieg i a hochs Fiaba
Owa i hob des im Griff
Nur mein Hausoazt, der Betriaga mant:
„Corona positiv.“

I sog: „Des gibt's jo ned
Sie san a a gschmierda Hund
I geh jetzt ham, leg mi ins Bett
Und in zwa Dog bin i gesund.“

Und glei am zweitn Dog
Kumm i eini ins Schbitoi
Horch zua wos i eana sog
Während i ins Koma foi

I sog: „Ihr kinnts mi ned betrügen
Ihr sads olle kauft und gschmiert
Ihr woits nur über mi verfügen
Weu i bin informiert.“

Refrain

Und de Kinda haum ka Schui, Mamas im Home-Office rotieren
Während Gschäftsleit eana Gschäft, und d'Leit ihrn Oabeitsplotz verliern
De Theater san zua und de Schdaummbeisln a
Die Ärzteschoft verzweifelt und die Oma schdirbt alla

3

I woch auf und bin im Hümmi
Vor mir sitzt a oida Mau
Der sogt: „Wo host da denn do docht dabei?
Wos host denn du do dau?

Du kunntast jetzt nu unten sei
Du kunntast heit nu leben
Datst ned jedn Bledsinn glauben
Und afoch nochiredn.“

Und i schau man genau au
Und daun blattlt i eam auf:
„Du bis Hochrisikogrupp
Und host ned amoi a Masken auf!“

Er sogt: „Heast, i bin da Herrgott...“
„Jo, des kau a jeda sogn
Wo ma higeht, wo ma hischaut
Überoi wird ma betrogn.“

4

Er geht telefonieren
Und i hea eam leise redn:
„Horch zur Mephistopheles
I hätt do wieder wen

Bei mir sitzt a so a Surm
Herrgott, Kruzifix
Der is an Corona gschdorbn
Und der glaubt scho wieda nix.“

Und sie bringan mi gaunz owi
Zu dem Geist der stets verneint
Und wen glaubst, wen i dort triff?
(Genau:) Olle meine Freund

Und mir san uns einig, mir lossn
Uns ned manipuliern
Mir basteln rot-weiß-rote Fahnen
Und mir gengan spazieren

Refrain

Und de Kinda haum ka Schui, Mamas im Home-Office rotieren
Während Gschäftsleit eana Gschäft, und d'Leit ihrn Oabeitsplotz verlier
De Theater san zua und de Schdaummbeisln a
Die Ärzteschoft verzweifelt und die Oma schdirbt alla

5

Wir brechen aus da Höll aus
Und wir schdeign schdeil empor
Und schdengan endlich wieder
Vor dem großen, weißen Tor

Der Portier, der wos heraußen schdehd
Der möt uns olle au
Und in da Tia erscheint wieder
Der oide weiße Mau

„Wos woits denn ihr scho wieder do
I hob wirklich aundre Sorgen
Wissts wos, damit a Rua is:
Ihr werds olle wiedergeborm“

Es is da Deufö überfordert
Und da Herrgott hod ka Freid
Und drum gibt's auf da Wöd
So vü blede Leit